

**Bələ nii sagı tə, Polə nə púpúní
 ɔ pa
 Koréntə
 Kərisə lià tə nə
 Koréntə tián bələ nii sagı tə
 yuu wa sɔgɔ**

Liù tə, ɔ nə púpúní sagı ku tə
 Ku yi *tɔntɔnu Polə nə púpúní ku.

Lià tə nə, Polə nə púpúní
 Ba boŋə sagı ku tə ‹bələ nii sagı› tə, Polə púpúní ɔ pa *Kərisə lià tə nə, ba nə wulə Koréntə nə.

Sagı tə wa sɔgɔ
 Polə púpúní ba, pwiə yà nə tə wulə *Kərisə lià tə tətəŋi wa, yiri. Ba wa liù don twɪn Polə zənzən. Yá ku tə nə dwə, ba wa lià duən kúù ba cígá kàrà tə, Polə nə bɪrɪ tə nii nə, twá.

Polə caga ɔ tiàn yiri, ɔ ga pìà, sə ɔ pa ba lɔwari, ɔ tɔtɔŋi tə nə yi nətu, ɔ nə yi Zwezi-Kərisə *tɔntɔnu tə yiri. ɔ bɪrɪ də, Zwezi-Kərisə tɔntɔnu mɛ, sə ɔ vwa ɔ tiàn míámíán Zwezi nə, ɔ ma tun.

Polə jònì Kərisə lià tə Koréntə nə

(Kolosə tián 1.1-8; Galasi tián 1.1-5)

¹ Yu twá də ɔ fira tə, ɔ ma kúrí à mù Polə, sə à ya Zwezi-*Kərisə *tɔntɔnu. À mù də Timote, ɔ nə yi don tə, ɔ nə yi á nubiu Kərisə yiri, nə púpúní sagı ku tə, nə pɪn á mù Kərisə lià púlí tə

nø, ku nø wulø Korentø nø. Nø pìà, sè sagi ku tē yí lià tē dē mama, ba nø yí Kērisø nø ti, ba ga wulø Akayi nagwanaa tē wa. ² Nø nyina Yui dē *Yuu-Tiu Zwezi-Kērisø nø wá fwa pubwanu á yira, yá ba ga pa aba bican sié.

Nø kēni Yui lèèèè, v nø zùrì nø bicanì nø càn wa yiri

³ Nø pian dun Yui nø, v nø yí nø *Yuu-Tiu Zwezi-*Kērisø Yui, v ga yí v nyina dē. U mù nyina tēntē dēri lià yinogē, v ga zùrì lià bicanì dē. ⁴ Máná mama, càn nø yí nēba, v mù nø yáá zùrì nø bicanì, sè ku pa nø dē wání nø zùrì lià tē bicanì, ba nø wulø càn yiri mama wa, ndē Yui nø fwa nētū nø yira. ⁵ Nētū tē Zwezi-Kērisø nø dí càn zēnzēn, yá nø dē ga wulø càn zēnzēn wa, mē nētū nø, Yui wá twá Zwezi-Kērisø, v ma zùrì nø bicanì zēnzēn. ⁶ Yá nø dàń nø dé càn, ku yí, sè ku pa á bicanì zùrì. Ku ga tē wá pa Yui pa á ya v cwəŋə tē wa. Dē nø bicanì nø zùrì, ku yí, sè ku pa á dē bicanì wání tē zùrì, sè á ja pínú, dē càn tē tē, nø nø wulø tē wa, yiri nø yí aba. ⁷ Nø dàń ja yala dē aba, nø ga yèé dē, á dē nø wulø càn tē wa, nø dē nø wulø tē wa, Yui wá zùrì á bicanì, ndē v nø zùrì nø dē bicanì nētū.

(2 Korentø tián 4.8-18; 2 Timote 2.8-12; Filipø tián 1.27-30)

⁸ Nø nubia-ba, nø pìà, sè á lwarì, nø nø dí càn nētū Azi nagwanaa tē wa. Nø dí càn zēnzēn, tē càn tē nø dwə nø diàn. Yá tē dàń pin, nø yá kúú ba yala jē dē, nø mu wá ya luv wa. ⁹ Nø tētē bicanì wa, nø yá ken nø sírí dē, ku yí nø tian nø yí. Ku yoo tēntē tun, sè ku pa, nø kúú dàn ká ja

nø tətə diàn, sə nə dån ja Yui tə, v nə bwin tıga tıan wa, diàn. ¹⁰ Mə v m̀ m̀ nə van nəba v li, yá v ga tə wá van nəba v li tə m̀ tıan təntə yiri wa. Cígá mama, nə jə yala də, v tə wá van nəba v li tə wa. ¹¹ Á də tətə wá san, á lòrì Yui, á pa nəba. Yá Yui dån wá fwa v pubwanv tə nə yira, là zənzən nə lòrì wá ba pın nəba yiri. Máná tə, Yui nə wá le nəba, v ga san nəba, kv wá ya là zənzən nə wá kə v lèèè ba pa nəba.

¹² Á nəjə yoo tə, kv nə pın nə wàá á yoo nə tì, nə ma bwı nə tiàn nə. Nə yèé nə pubıja wa də, nə jun nə tiàn, nə wà durən yìèn fwa. Nə yın cígá wa luv kv tə wa, kv tə nə dwə, á m̀ yáá con. Kv nətv tə yi Yui nə pın kv tun. U m̀ yà nə kəni nəba cwəjə wa, də v pubwanv tə, kv tà nə tətə pubıja yà nə kəni nəba cwəjə wa. ¹³ Kv tə, nə nə púpúní nə pa aba, kv wa ba yosəgu mama jə. Mə kv m̀ nə á kàrì sagı kv tə wa, yá á ga nèn kv dèn. À bıja də, kv ja vəli kv yígúré wa, á wá lwarı kv dèn míámían. ¹⁴ Kv yi ndə á tə wà lwarı míámían, də dıın tə, nə Yui-Tiu Zwezi nə wá pıı v bà, á wá tì nə yoo, á ma bv á tiàn nə, nə də ga wá tì á yoo, nə ma bv nə tiàn nə.

Polə pıı v lwàn v kúv bá va Korentø

¹⁵⁻¹⁶ Á m̀ jə á yala nətv. Kv m̀ nə pın, à yá dí yáá à kə sírí, sə à bà à zıgı á con, à va Masedwanə nagwanaa. Yá máná tə, à nə kúv pıı à naıja Masedwanə à bıàn, à tə wá twá á con, sə á san nə, sə à lə à va Zwide nagwanaa. Kv nətv dån wá pa, Yui kúv fwa v pubwanv tə á yira nəè bələ.

17 Yá à nè kùù pìí à lwàń à pubuŋa tə, ku tà tɔtɔ, ku jə dèń. Á yèé də, à ba yoo tɔŋa də à tətə fira. À ba <awo> də <ɔn ɔn> swìn, à gùlí duən wa, yoo nədu yuu wa. 18 Yɪ yɪ liù tə, ɔ nə yɪ pùé nədu tíú. Yá ɔ mù Yɪ təntə yèé də, nə wà <awo> də <ɔn ɔn> ma gùlí duən wa yoo nədu yuu wa. 19 Á yèé də, ku yɪ Yɪ tətə biù Zwezi-*Kərisə yoo nə, à mù Polə, də Silasə də Timote swìn nə bɪrɪ aba. Zwezi-Kərisə tà <awo> də <ɔn ɔn> liù. U yɪ <awo> liù mánǎ mama wuuu. 20 Yɪ twá də ɔ mù, ɔ ma swìn, ɔ wú <awo> wiən tə mama yuu wa, ɔ nə kàn nii. Yá nə də ga tə twá də ɔ mù, nə ma wú <amɪna>, sə ku pa dun Yɪ nə. 21 Ku tə nə sùrí lá, Yɪ tətə nə pɪn nə mù də á mù zɪga dɪàn, nə ma twá Zwezi-Kərisə nə. Mə ɔ mù Yɪ nə kùrí nəba, ɔ kə vàn nə, sə nə tɔn nə pa wá. 22 Yɪ nə ken ɔ *Siŋu tə nə bɪcanɪ wa, ndə mɪmɪnan nə, sə ɔ ma bɪrɪ də, nə yɪ ɔ mù nyiən. U Siŋu təntə nə yɪ wozəŋə tə, ɔ nə tanɪ ɔ tún təntən nyiən, ku ga bɪrɪ də, wiən duən tə wulə, ɔ nə wá pa nəba.

(2 Korentø tián 12.19-21; 13.1-2, 10; 1 Tesalonikə tián 2.3-12)

23 Yɪ mù yèé ku tə, à nə buŋa à waa con. Də ku nə yɪ kunkun nə à kuni, sə à mɪ zwèe. Won tə, ku nə pɪn à wà pìí à bà á con Korentø nə, ku yɪ à ba pìà, sə à bà à tɔn lwanɪ á yɪra. 24 Ku tà nə pìà nə kálí aba, sə nə swìn á con, nətɔ á nə mɛ, sə á kə á waa Zwezi-Kərisə nə. Nə yèé də, á keni á waa Zwezi-Kərisə nə wuuu, á ga zɪga dɪàn. Yá ku dǎn yɪ nə pìà nə tɔn də aba, sə ku pa, á wàní á ya pupwən wa.

2

¹ Á nənə, à pubuŋa tə nə yi nətu. À pubuŋa wa à ba pìà, sə à pìí à bà á con, də à túrí tə nə wá bwé ku kə aba pucvni wa. ² Də à nə ken aba pucvni wa, á mù yà ga nə me, sə á poli à pùé, wàà dān nə kùù wá poli à pùé? ³ Mə ku mù dān nə pɪn, à ma dí yáá à púpúní sagɪ á nə, yá à ga kùù wà twi, sə à na aba. Də à yà nə twi á con, á yà wá pa à pùé cùgù. Yá á mù yà nə me, sə á pa à pùé poli. Ku yi cígá, à jə á mama dīàn ku yoo tə wa. À ga yèé də, à nə wulə pupwən wa, á də mama wulə pupwən wa. ⁴ À dí yáá à púpúní sagɪ təntə á nə, sə á lwarɪ də, á yoo yì nə zənzən, ku pa à pùé cùgù, à ga kwi yinɪa á yɪrɪ, mánjá tə wa, à nə púpúní sagɪ ku tə. Ku dān nə tà à púpúní á nə, sə à kə pucvni á nə. Ku yi à púpúní á nə, sə à pa á lwarɪ, à nə swə aba zənzən nətu.

Á tíé yoo tə, á dɔgv tɪa!

(2 Korentø tián 7.5-16; Likə 17.3)

⁵ Də liù nə fwa pucvni yoo, ku tà à mù cɪcɪ yɪra nə, v fwa ku. Ku yi á mù mama yɪra nə, v fwa ku. Ku nə swə ku tà á mama, á lià duən mù pwií cùgù. À ba pìà, sə à man ku, à pa ku doni juun. ⁶ Á wa lià zənzən ken càn zənzən ku bæ təntə nə, v nə tun ku yoo tə. Yá ku dān me, sə á yá ku me nətu. ⁷ Yá síún nə, á dān me, sə á tì v yoo tə á dɔgv tɪa, sə á pìí á zùrì v bɪcan. Ku nə tà nətu, pucvni wá zu wá zənzən, ku pa v jìàn gwàrì míámíán. ⁸ Ku mù nə pɪn, à dān kwè aba, sə á pìí á bɪrɪ wá də, á swə wá. ⁹ Á nənə yoo tə don də, à nə púpúní à sagɪ tə, à pa aba, ku yɪrɪ.

À púpúní kv, sə à ma dédén aba à jén, á zìlì à nìi yoo mama wa naaa. ¹⁰ Yá síón nə, liù tə, á nə tì v cuna á dɔgv tɪa, à də tì kv à dɔgv tɪa. À mù con, à tì bæ təntə cuna tə, à dɔgv tɪa á mù yɪrɪ Zwezi-*Kərisə yáá con. ¹¹ Nə yèé kv tə, *Sɪtana nə pìà, sə v fwa, zəni. Yá à ba pìà, sə Sɪtana twá cuna təntə nə, v dé dɪàn nə yuu wa.

Polə twá Tərowasə v lə

¹² À yà zàn à va Tərowasə, sə à swìn Zwezi-*Kərisə suywánú tə à bɪrɪ lá. Máná tə, à nə yí lá, à nɪ də, *Yuu-Tiu yà súrí cwəŋə, v pa nə, sə à swìn v suywánú tə. ¹³ Yá à bɪcan wa, à yà ba sié jə, à nə wà Titə nɪ, v nə yɪ à nubiu Kərisə yɪrɪ. À dǎn ma lòrɪ cwəŋə, Kərisə lià tə con Tərowasə nə, à ga lə à va Masedwanə nagwanaa tə wa.

Zwezi-Kərisə dí dɪàn

(Romə tián 15.17-19; 1 Korēntə tián 1.17-24; 2 Korēntə tián 4.1-7)

¹⁴ Nə dǎn kənə Yɪ lèèèe, v nə bɪrɪ nəba luv nə, ndə nə yɪ bàn dɪè lià, kwatara yuu tíú nə ta kùb, ba ja ba vaŋa. Yá v dǎn ga twá də nə mù, v pɪn ba lwarɪ Zwezi-*Kərisə bwálí mama wa. Nə dǎn yɪ ndə lwán* nə, tə nə súé bwálí mama, sə kv pa lià tə lwarɪ Zwezi-Kərisə. ¹⁵ Nə mù dǎn yɪ ndə lwán nə, tə nə ywán Yɪ yáá con, tutuŋɪ tə yɪrɪ, Zwezi-Kərisə nə pɪn, nə tɪŋa. Nə swìn v yoo lià tə con, Yɪ nə wá jon ba ba cuna wa, də lià tə con, ba nə wá tɪ ba jén míámíán Yɪ

* **2:14** 2.14 Dí yáá nə, *Romə-ba luv wa pìú tə, v nə ta kùb v dé, v kwatara tə yáá pú v kwa, ba ja twá tɪv tə wa ba lə, sə kv pa wá dun. Ba yàá lwá tɪralɪ də tɪralɪ nuga tə lwán nə ywán.

yáá con. ¹⁶ Ku nə yi là tə, Yu nə wá jon ba ba cuna wa con nə, nə yi ndə lwán nə, tə nə ywán, tə nə biri də, ba wá na mi, ku nə ba zwèe Yu con. Yá ku dàń nə yi là tə, ba nə wá ti ba jén míámíán Yu yáá con, nə yi ndə lwán nə, tə nə ba ywán, tə nə biri də, ba wá ti Yu yáá con. Liù təlél, v nə wáá tə yìèn təntə v tɔŋa. ¹⁷ Nə mù tà ndə là zənzən nə, ba nə swìn Yu sɔgv tə, ba biri, ba ma pià nywarɪ ndə baywələ nə. Nə mù yi Zwezi-Kərisə tùtùna. Ku mù nə pɪn, nə swìn Yu sɔgv tə, nə biri də nə cígá mama v mù Yu yáá con.

3

*Polə yi v tɔŋa Yu nimarv nədɔn tə yiri
(1 Korentø tián 9.1-3; 2 Korentø tián 5.18-21)*

¹ À dàń pià, à bwe aba, à jén, ku yi nə wulə nə púpúní sagɪ ku tə, sə nə ma biri aba ku tə, nə nə yi naaa? Nə à yèé, ku mɛ, sə nə də lòrì aba, ndə là duən nə, sə á púpúní sagɪ, á pa nəba, sə nə ma pa ba lwarɪ ku tə, nə nə yi? Nə à yèé ku mɛ, sə là duən púpúní sagɪ, ba pa aba, sə ku biri nətɔ tə, nə nə yi? Mə ku yi nətɔ là duən con.

² Á tətə yi ndə sagɪ nə, ku nə púpúní nə bɪcanɪ wa. Yá là tə mama wáá ku ba kàrì, ba ga wáá ku ba lwarɪ. ³ Ku yi cígá, á yi ndə sagɪ nə, Zwezi-*Kərisə nə twá nə tɔtɔŋɪ tə nə, v ma púpúní. Ku tà níá tə, ba nə ma púpúní sagɪ, v ma púpúní sagɪ təntə, ku yi Yu tə, v nə wulə mi wa, *Siŋu tə, v

ma púpúní kv. Kv tà kapana* púpúnú daborubii yuu wa, v púpúní kv. Kv yi læzoni bicanı wa v púpúní kv.

⁴ Fən ba nəba jə kv yoo təntə yuu wa Yı yáá con, Zwezi-Kərisə yırı. ⁵ Nə yèé zəni də, nə tətə diàn wà yí, sə nə tun won mama. Kv yi Yı nə pın nəba diàn, sə nə wàní nə tun. ⁶ U mù nə pın nəba diàn də, sə nə wàní nə ya v tütònà, nə swìn v *nimarv nədun tə yoo, nə bırı là nə. U nımarv nədun təntə tà Yı *nii tə, ba nə púpúní ba tún, kv yi Yı-Sıju tə. Yı nii tə, ba nə púpúní ba tún, yà pın là tə tı Yı yáá con. Yá Yı-Sıju tə mù yi kv pın nəba mı tə, kv nə ba zwèè Yı con.

(Ebərə-ba 8.6-13; 12.18-29)

⁷ Yı nii tə yà yi kv púpúní kapana púpúnú daborubii yuu wa. Yá *Moyizə dān yà mə, sə v twá də Yı nii təntə, kv nə pın là tı Yı yáá con, v tun v pa Yı nə. Də kv nətv mama, Yı pın Moyizə yáá pıplı də dun, *Yızərayelə là tə nə wàri v yáá wa ba ywàŋá, tə yırı. Yá v dun təntə yà ga bá ya lá, máŋá mama wuuu. Də Yı nii tə, kv nə pın là tı v yáá con, nə bırı v dun tə nətv, ⁸ Yı-Sıju tə dān pın, là na dun nəfarv, tə nə dwə nətv. ⁹ Də Yı nii tə, kv nə pın v bürı là bürà, sə v cùgù ba, nə bırı nəba Yı dun nətv, Yı cígá tə, v nə wá ma pa, sə nə ya cígá tián v mù Yı yáá con, dun wá doni nətv. ¹⁰ Nə dān wáá nə swìn də, dun nəfarv twi síún nə, tə dwə dí yáá dun tə. Yá dí yáá dun tə dān yi ndə tə kúb

* **3:3** 3.3 Yı *nii tə, v nə pın *Moyizə nə, yà yi kv púpúní kapana púpúnú daborubii yuu wa.

tələ. ¹¹ Ku yi cígá də, wiən tə nə bá ya lá máṅá mama, nə jin dun nətu, ku pià ku biri nəba də, wiən tə, tə nə wulə máṅá mama, dun wá doni.

¹² Nə dān jə yala təntə, ku mù nə pɪn, nə jə wɔdɪv, nə ma swɪn tə nəpon nəpon. ¹³ Nə ba fwa ndə Moyizə nə yáá tì gankíkala, v ma pú v yáá nə. V yáá fwa nətu, sə Yizərayelə lià tə dān ká na Yu dun tə nə wá zwèe, tə yá v yáá tə nə nətu. ¹⁴ Yá Yizərayelə lià tə mù con, ba yun yà kva, ku pa ba ba ku dèñ nèñ. Də zèn mama, mə ku tə yi nətu, ku pa ba bia tə də nə. Ba nə kàrì Yu də ləzoni nimarv nədwan saga tə, ku yi ndə gankíkala təntə nə púó ba yía nə. Ku yáá pa, ba ba ku dèñ nèñ. Ku yi nətu, ku nə yi Zwezi-Kərisə cɪɪ nə wáá gankíkala təntə, v li liù yía nə yɪɪ. ¹⁵ Də zèn mama, ba nə kàrì Moyizə saga tə, ku yi ndə gankíkala təntə yáá pú ba yía nə, ba ba ku dèñ nèñ. ¹⁶ Yá máṅá tə wa, liù tə, v nə vəvəri v tiàn, v kə *Yuu-Tiu con, gankíkala tə yáá nan, ka yá v yía nə. ¹⁷ Ku yi nətu, sə ku biri də Yuu-Tiu tə nə yi Yu-Siṅu tə, Yuu-Tiu Siṅu tə ga nə wulə bwálí nə, ku yáá pa lià tə tɪnɪ ba tiàn. ¹⁸ Nə dān ywàṅá Yuu-Tiu ndə zəṅu nə, v dun tə nə pɪpɪli ku wa. Gankíkala kúv wà nə mù liù mama yía nə pwí. Máṅá tə, nə nə ywàṅá wá, Yuu-Tiu Siṅu tə dān lwàní nəba, ku pɪn nə kwɛn nə nyɪn də Yuu-Tiu də dun, tə nə dáá zənzən, tə nə sùrí wuuu.

*Nə mù ba diàn jə, yá Yü ga pın nəba diàn
(1 Tesalonikə tián 2.1-6; 2 Korentə tián 2.14-17)*

¹ Yü dəri nə yinəgə zənzən, ɔ ga pa nəba tɔtɔɲi təntə, ku mù nə pın nə jìàn ba gwàrì. ² Nə dān vɪga cavɪra yokɔkwɪnan tə, là nə sègè ba tɔɲa. Nə ba tɔɲa də yíá swɪan, nə ga ba Yü sɔgɔ tə lwàní. Yá nə mù dān yɪ cígá tə, nə yáá swɪn nəpon nəpon, sə ku pa, là tə mama lwarɪ də, nə yɪ cígá là Yü yáá con. ³ Nə swɪn sɔywáɲú tə, nə bɪrɪ là nə. Yá gankɪkala tə púó là duən yíá nə, ba ba sɔgɔ təntə dèñ nèñ. Ba mù là təntə yɪ là tə, ba nə wá tɪ, ba jén Yü yáá con míámíán. ⁴ Ba mù là təntə ba sɔywáɲú tə dèñ nèñ. Luɔ ku tə pìú *Sɪtana nə cìgá ba pubɔɲa nə, ba dān ká nì ku dèñ. ɔ ma kúò ba pìà, sə ba na Zwezi-*Kərisə sɔywáɲú tə poni tə, ku nə bɪrɪ ɔ dun tə. Mə ɔ mù Zwezi-Kərisə nə nyɪn də Yü cígá cígá. ⁵ Máná tə, nə nə kàrì Yü sùràn tə, nə bɪrɪ, ku tà nə tətə yoo, nə yáá kàrì nə bɪrɪ. Ku yɪ Zwezi-Kərisə, ɔ nə yɪ *Yuu-Tiu tə yoo, nə yáá swɪn nə bɪrɪ. Yá nə mù dān yɪ á tùtònà Zwezi-Kərisə yɪrɪ. ⁶ Máná tə, Yü nə fwa luɔ, ɔ swɪn, ɔ wú: «Poni wá pɪpɪlɪ yikunu wa». Mə ɔ mù Yü tətə nə pın, ɔ poni tə pɪpɪlɪ nə bɪcanɪ wa. Poni təntə pın, nə na ɔ dun tə, tə pɪpɪlɪ Zwezi-Kərisə yáá wa.

(2 Korentə tián 6.3-10; 1.5-11; 2 Timote 2.8-11)

⁷ Nə bwànà ndə tɪran nəkənə nə. Yá nə ga jə won təntə, ku kwənə nə dáá, nə bɪcanɪ wa, sə ku pa diàn təntə, tə nə dwə tə mɛ, ya Yü diàn, ku dān ká ya nə tətə diàn. ⁸ Là zɪga nə

nə bwálí mama nə, yá ba wà nəba cùgò. Ba ken nəba yojanan zənzən wa, yá tə ba pɪn nə li yala míámíán. ⁹ Ba kəni nəba càn wa, yá Yɪ ba nəba vɪ ɔ dɔga. Ba janɪ nəba ba dɪlɪ tɪa, yá ba ba nəba gwɪ. ¹⁰ Mánǎ mama, kɔ dǎn yɪ ndə Zwezi tɪan tə yiri wulə nə yuu wa, sə kɔ pa lià twá də nəba, ba ma lwarɪ mu tə, Zwezi-Kərisə nə wulə kɔ wa. ¹¹ Kɔ yɪ cígá də, mánǎ tə mama, nə nə wulə lɔv kɔ tə wa, nə kəni nə tiàn tɪan jìàn wa mánǎ mama wuuu, Zwezi-Kərisə yɪrɪ, sə kɔ pa lià twá nə mù nə wá bà nə tɪ tə nə, ba ma lwarɪ mu tə, Zwezi-Kərisə nə wulə kɔ wa. ¹² Kɔ nətv dǎn pɪn, nə mù yɪ nə wulə tɪan jìàn wa, yá kɔ tə wá pa á na mu Yɪ con.

¹³ Nə mama pubɔŋa yɪ nədv, nə nə twá kɔ nə, nə ma kəni nə waa Yɪ nə, ndə kɔ púpúní Yɪ sagɪ tə wa, kɔ wú: «À keni à waa Yɪ nə. Kɔ mù nə pɪn, à swìn ɔ yoo». Nə də keni nə waa Yɪ nə wuuu nətv. Kɔ mù nə pɪn, nə də swìn ɔ sugɔ tə, nə bɪrɪ. ¹⁴ Yá nə dǎn yèé də, liù tə, ɔ nə pìí ɔ bwin Yuu-Tiu Zwezi ɔ li tɪan wa, ɔ wá pìí ɔ bwin nə də ɔ li tɪan wa, nə də Zwezi-Kərisə nə vwə duən nə yɪrɪ. Ʋ dǎn wá ja nə mù də á mù mama, ɔ bà ɔ yáá con. ¹⁵ Yìèn təntə mama tvn á mù yɪrɪ, sə kɔ pa Yɪ fwa ɔ pubwanɔ tə lià zənzən yɪra ɔ sùrí wuuu. Kɔ nətv wá pa, lià ya dǎnɪ zənzən ba kə Yɪ lèèèe də ba pɪn wá dun.

*Nə kənə nə pubɔŋa Yɪ sǎn wiən tə yuu wa!
(1 Piyerə 1.6-9; Romə tián 8.23-25; Filipə tián 1.23; Ebərə-ba 12.28-29; Tɔtvnan 24.15-16)*

¹⁶ Kɔ mù nə pɪn, nə vǎnà ba gwàrì. Nə yèé də, nə yɪra tə mù yɪ tə gwàrì mancɪn mancɪn.

Yá Yı dān pın yoo tē, kú nē wulē nē pubuŋa tē wa, lwàní kú jì nēdun, dıın mama. ¹⁷ Kú yı cígá, síún nē, nē wulē càn mancın wa. Yá nē dān wá na dun nēfaru càn tēntē yırı. Dun tēntē dwē won mama, tē ga wulē máŋá mama wuuu, kú nē ba zwèe. ¹⁸ Kú nētu dān pın, nē mù pubuŋa kùd tēlé wiēn tē yuu wa, ba nē na yía wa. Nē pubuŋa dān yı kú wulē wiēn tē yuu wa, ba nē ba na yía wa. Wiēn tē, ba nē na yía wa, tē mù yı tē wulē máŋá mancın wa. Yá wiēn tē, ba nē ba na yía wa, tē mù wulē máŋá mama wuuu, kú nē ba zwèe.

5

¹ Nē yıra tē yı ndē diè nē, nē mı tē nē wulē kú wa tia ka tē yuu. Kú diè tēntē ga wá tu dıın don nē. Yá nē dān yēé dē, dıın tē, diè tēntē nē tua, Yı wá pa nēba yıra duēn, sē tē dē kùd ya nē mı tē diè, Yı sán nē. Tē mù yıra tēntē kùd ba cùgà, ndē diè nē, lēzoni nē lwè dē ba jìàn. Nē mı tē dān ga wá ya kú wa, máŋá mama wuuu, kú nē ba zwèe. ² Síún nē, nē dān yı nē bıbılı, máŋá kú tē wa, nē mı tē nē wulē tia yuu yıra tē tē wa. Nē pià, sē Yı pa, nē mı tē zu yıra tēntē wa, tē nē wulē u con, ndē ba nē zwı gànù nētu. ³ Máŋá tē, nē mı tē nē zua Yı sán yıra tēntē wa, mē tē mù dān nē wá ya nē yıra, máŋá mama wuuu. Yá nē mı tē kùd bá ya wala Yı yáá con. ⁴ Máŋá kú tē nē mı tē nē wulē tia yuu yıra tē tē wa, nē yı nē bıbılı ndē zılı nēfaru nē wulē nē yuu wa. Kú yı cígá, nē ba pià, sē Yı ja nē yıra tē tē u li, u yá nēba. Kú yı nē pià, sē u pa nēba yıra nēdun tē,

ku nə ba ti, sə ku jon yira nədwan tē, ku nə ti tē yuu nə. ⁵ Yu tətə dān nə tanı nəba v tún, sə v pa nəba mu təntə. U pın nəba v Sinu tē, ku nə yi wozəhə tē, v nə tanı v tún təntən nyiən, ku ga biri də, wiən duən tē wulə, v nə wá pa nəba.

⁶ Ku nətv dān pın, nə jìàn jə dìàn máǵá mama, nə ga yèé də, máǵá tē mama, nə mu tē nə wulə nə tia yuu yira tē tē wa, nə ǵúná də *Yuu-Tiu.

⁷ Nə yèé də, ku yi nə kəni nə waa Yu nə wuuu, nə ja wulə, ku dān nə tà nə na wá nə yía wa.

⁸ Ku yi cíǵá, nə jìàn jə dìàn zənzən, yá nə dān tē swə, sə nə mu tē nan, ku yá nə yira tē tē, sə ku va ku ya də Yuu-Tiu Zwezi-Kərisə v sǵn nə.

⁹ Ku mù nə pın, ku tē dān nə yi nə pubuǵa yoo, ku mù nə yi, sə nə tvn ku tē nə poli v pùé. Nə pià, sə nə tvn ku, də nə mu tē nə wulə yira tē tē wa, nə à yèé, də nə mu tē nə nan ku va v con.

¹⁰ Nə mama me, sə nə va nə zıǵı Zwezi-Kərisə yáá con, sə v bürì nə bürà. Yá liù mama dān wá na v zəni tē, nə à yèé v lwanı tē, v nə fwa tia yuu wa, ǵwírán.

Zwezi-Kərisə pın nə mù də Yu piı nə kə duən yuu

(Romə tián 5.1-11; 6.2-13; Efezə tián 4.20-24)

¹¹ Nə mù dān yèé, ka zılı *Yuu-Tiu nii dēn. Ku mù nə pın, nə kəni dìàn, sə nə pa lià lwanı cíǵá tē. Yu yèé ku tē, nə nə yi zəni, yá à buǵa də, á də pubuǵa wa, á yèé nəba zəni. ¹² Nə ba pià nə piı nə biri aba, ku tē nə nə yi. Ku yi nə pià, nə yá cwəhə nə pa aba, sə á ti nə yoo, á ma bu á tiàn nə. Ku mù nə wá pa, á wànı á le lià tē, ba nə fwa fwiə ku tē yiri, ba nə na ba yía wa, ba

ga ba ku tē nē wulē bican wa, jēlē. ¹³ Ku yi cígá, á buŋa dē, nē nyàŋà naaa? Nē nē nyàŋà, ku yi Yu ci ci con. Yá nē dàń nē ba nyàŋà tē, ku yi á mù con. ¹⁴ Ku tē mama nē nē fwa, ku yi Zwezi-Kerisē sonu tē nē yugē nēba. Nē yēé dē, v mù liù nēdv tē nē tīga lià tē mama yuu yiri, yá ku dàń biri dē, ba mama twá dē wá ba ti. ¹⁵ U tīga luv ləzoni mama yiri, sē ku pa ba tē nē wulē mi wa, twá ku tē nē, v nē pià, ba kùv dàn ká twá ba tētē fira yìèn tē nē. Mē ba mù yiri nē v tīga, v ga pií v bwin v nan tian wa.

¹⁶ Ku mù yiri, síún nē, nē kùv ba lià kúrí duən wa, ndē ləzoni nē fwa nētv. Dí yáá nē, nē yà jē pubuŋa tētē, nē ma jēlē Zwezi-Kerisē. Yá síún nē, ku tà pubuŋa tētē, nē kùv ma jēlē wá. ¹⁷ Liù tē mama, v nē vwē v tiàn Zwezi-Kerisē yira, ku tiú jigē laduv. Yodwara tē mama, v yà nē wulē tē wa dàń lē, yá á nēŋē v yìèn mama dàń jigē yodura. ¹⁸ Ku yi Yu nē tuŋa yìèn tētē mama. U tun Zwezi-Kerisē, sē v pa nē mù dē v mù Yu pií nē kē duən yuu. Yá síún nē, Yu dàń tun nēba, sē nē swìn nē biri dē, v pià, sē v mù dē lià tē mama pií ba kē duən yuu. ¹⁹ Ku yi cígá, Yu twá Zwezi-Kerisē, v pa luv ləzoni tē mama dē v mù Yu pií ba kē duən yuu. Yá Yu wà ba cuna tē jēlē v kē ba yuu wa. Yá v dàń tun nēba, sē nē swìn lià tē con dē, v pià, sē v mù dē ba pií ba kē duən yuu.

²⁰ Nē dàń yi Zwezi-Kerisē tuntuna. Ku yi ndē Yu tētē nē twá nē nii sùràn tē nē, v ma kwē lià tē. Nē lòrì aba Zwezi-Kerisē yiri, sē á pa á mù dē Yu pií á kē duən yuu. ²¹ Zwezi-Kerisē yà wà

cuna tun míámíán. Yá Yui ken nə mù cuna tə v yuu wa. Yui fwa kv nətə tə, nə mù yiri, sə kv pa v twá nə mù də Zwezi-Kərisə nə wulə duən nə tə, v pa nə jì cígá tián v mù Yui yáá con.

6

(1 Tesalonikə tián 2.1-13; 2 Timote 3.10-11; 2 Korēntə tián 11.23-30)

¹ Nə yi Yui tütònà. Yá nə yi nə tunja duən nə. Kv mù yiri, nə dǎn kwè aba, sə á dǎnà ká pa, Yui pubwanə tə, v nə tun á yira, jì tutə. ² Kv yi cígá, Yui swìn, v wú:

«À le n yijunə tə, máǰá tə wa, à nə pià, sə à le mú. Máǰá nə yí, sə à jon lià tə cuna wa, à san mú».

Á nəǰə, kv yi máǰá kv tə wa, Yui wá fwa nəba zəni. Á nəǰə, kv yi máǰá kv tə wa, Yui dǎn pià v jon lià tə. ³ Nə nə tunja nə pin Yui nə tə yiri, nə ba pià, sə lià na cwəǰə ba cəǰə nəba, nə tutunə tə wa. Kv mù nə pin, nə ba yoo tunja, kv nə wá pa, lià dugə Yui cwəǰə tə ba jén. ⁴ Yá yoo mama wa, nə yáá kə diàn, sə nə biri də, nə yi Yui tütònà. Nə yáá ja pínú wuuu, kv nə yi càn, nə à yèé wiən nə mùrì nəba, nə à yèé pucunə, nə tə yáá píní tə wa. ⁵ Ba nə mà nəba, ba kə bǎn diè wa, nə à yèé, ba nə sugu lià zənzən, ba kə nə nə, nə à yèé ka tun tutuncaran ka gwàrì, nə tə yáá píní tə də wa. Kv nə yi nə nə wàrì nə dwèe, nə à yèé niən janə, nə tə yáá píní tə də wa. ⁶ Nə ba nə tiàn kəni durən yìèn wa, nə biri də, nə yèé Yui cígá tə. Nə jə pínú, nə ga yi woywanyina də. Yui-^{*}Sinju tə wulə də nəba, nə

swə lià tə duən tə də bɪcan nədʊ. ⁷ Nə swìn cígá sɔgʊ tə nə bɪrɪ, Yɪ də pɪn nəba ʊ diàn tə kʊ yɪrɪ. Nə wulə Yɪ cígá cwəŋə tə wa, kʊ ga yɪ ndə nə ti kwatara zɪla, sə nə ma ta, də tə tə, nə nə ma cì nə tiàn nə. ⁸ Ba pɪn nəba dʊn, ba duən də ga kəni cavɪra nə nə. Ba swìn nə yozəŋə, ba duən də ga swìn nə yolwan. Ba jələ nəba ndə kunkʊna nə, yá nə ga yɪ cígá nə swìn. ⁹ Ba jələ nəba ndə ba yèrì nəba, yá ba mama ga yèé nəba zəni. Ba buŋa máŋá mama də, nə wá tɪ, yá á nəŋə, nə mɪ dàń ga tə wulə zəni. Ba kəni nəba càn wa, yá nə ba tɪ də. ¹⁰ Ba kəni nəba pucʊnɪ wa, yá nə ga tə wulə pupwən wa dɪn mama. Lià yáá con, nə yɪ ndə zʊra nə, yá nə mù ga nə pɪn lià zənzən jì jɪjə tián. Nə yɪ ndə nə ba won mama jə, yá nə ga jə wiən tə mama.

¹¹ Á mù Koréntə tián-ba, nə swìn á con nəpon nəpon. Nə swìn kʊ tə nə wulə nə bɪcanɪ wa, nə bɪrɪ aba. ¹² Nə mù wà nə bɪcanɪ pwí də aba, kʊ yɪ á mù dàń nə púé á bɪcanɪ də nəba. ¹³ Á swìn á con ndə nyɪna nə yáá swìn ʊ bia con nətʊ, sə á də sʊrí á bɪcanɪ á bɪrɪ nəba.

*Yɪ də woŋwanan nə ba duən nə tʊŋa nətʊ
(1 Koréntə tián 10.14-22; Efɛzə tián 5.5-11; 1
Piyerə 2.9-12; Apokalisə 18.4)*

¹⁴ Á dàná ká twá lià tə, ba nə tà *Kərisə lià tə nə, ba tʊtʊnkʊkwɪnan tə wa. Yoo tə, kʊ nə yɪ cígá Yɪ yáá con, də yoo tə, kʊ nə yɪ lwanɪ yoo wàrì duən nə tə kəni. Poni də yikunu də wàrì bwálí nədʊ tə yanɪ. ¹⁵ Zwezi-Kərisə də *Sɪtana wàrì duən yuu ba kəni. Yá nɪmarʊ yoo ga tələ

liù tē, v nē keni v waa Zwezi-Kōrisē nē wuuu, dē
liù tē, v nē wà v waa ken v nē, pwērē wa. ¹⁶ Yū
*diè dē wōṅwanan yoo tēlé duēn nē. Kū yī cígá,
nē mù nē yī ndē Yū tē, v nē wulē mī wa, diè tē
nē, ndē v nē swīn, v wó:

«À wá jēn dē ba, à ga wá ya ba tētēji wa. À wá
ya ba Yū, yá ba dē ga wá ya à mù là».

¹⁷ Kū mù nē pīn, Yūu-Tiu tē swīn, v wó:

«Á dān nāṅa là tē wa, ba nē tà Kōrisē là tē. Á
pīan á mù dē ba mù ya yīṅṅi dē duēn.
Á dānà ká dwen durēn won yīra, yá à mù
dān ga wá sēe à jon aba à kē à con».

¹⁸ Yūu-Tiu tē, v nē wulē tē mama yūu wa swīn
v sūrī lá, v wó:

«À wá ya á nyīna, á dē ga wá ya à bīa dē à bwīi».

7

¹ À nubisoni-ba, Yū kàn nikanī tētē, v pa
nēba. Kū mù yīri nē, nē dē dān mē, sē nē lī
nē tián durēn yīēn tē mama wa, tē nē cūgà nē
yīra tē dē nē pubūṅa tē. Nē fwa kū nētū nē va
nē yī máṅá tē, durēn nē kúò tēlé nē yīra, nē ga
zilī Yū nīi dē.

Polē pupwēn tē yoo

(1 Tesalonikē tián 3.6-9; Ebērē-ba 13.17)

² Á pīan nē yoo ya á bīcanī wa! Nē wà yolwan
tūn liù mama yīra. Nē wà liù mama cūgò. Nē
wà liù mama won gīgīri nē jon. ³ Á dānà ká bún
dē, kū yī à swīn sūrān tē tē, sē à ma kē yoo á
yūu wa. À dí yáá à swīn á con dē, á yoo wulē
nē bīcanī wa. Dē nē mī nē wulē lūu wa, nē à

yèé nè nè tɪga, won mama wàrì nèba, ku pwèe duən nè. ⁴ Fən ba nè jə á yoo wa míámíán. À jə cígá, sè à tì á yoo à ma bwɪ à tiàn nè. À bɪcan zùrì zənzən á yoo wa. Nə wulə càn zənzən wa, yá də ku nətu mə, à pùé tə poli zənzən, ka ja ɛ.

⁵ Ku yi cígá, nè nè twi nè yí Masedwanə nagwanaa tə, də zən mama, nè tə wà wàní nè sɪi mancɪn tətə. Càn yirə yirə twi, tə tu nè yuu wa. Lìà yà zàn, ba zɪga nè nè, yá nè bɪcanɪ də wa fən yà jə nèba. ⁶ Yá Yɪ tə, ɐ nè yáá zùrì pucɔnɪ lìà bɪcanɪ, dàñ twá Titə nè twi nè con tə nè, ɐ ma zùrì nè də bɪcanɪ. ⁷ Ku tà Titə túrí tə cɪcɪ nè zùrì nè bɪcanɪ. Ku tə nè sùrí lá, ɐ twi ɐ bɪrɪ nèba nətu tə, á nè zùrì ɐ də bɪcan. Ʋ bɪrɪ nèba nətu tə, á nè pìà, sè á pìi á na nè cígá cígá. Ʋ bɪrɪ nèba, á pùé nè cùgù nətu, də nətu tə, á dàñ nè pìà, sè á caga à yɪrɪ. Tə yìèn təntə dàñ pɪn, à pupwən tə sùrí zənzən.

⁸ À yèé də, sagɪ tə, à nè dí yáá à púpúní, á nè cùgù á pùé. Yá à mù con, à pùé ba cùgà ku yoo təntə yuu wa. À pùé nè swə ku cùgù, də ku yi à nè lwarɪ də, à sagɪ tə cùgù á pùé nè mánjá mancɪn wa yɪrɪ. ⁹ Yá síún nè, á pucɔnɪ təntə nè pɪn á vəvəri á kwa, á ma sá á cuna tə, dàñ pɪn à pùé poli. Ku tà à nè cùgù á pùé nè, tə nè pɪn à pùé poli. Á pùé tə nè cùgù tə yi ku twá də Yɪ fira. Ku mù yɪrɪ nè, ku tə, à nè púpúní, wà aba yolwan fwa. ¹⁰ Ku yi cígá, də pucɔnɪ nè twá də Yɪ fira, ku ma yí liù, pucɔnɪ təntə yáá pa ɐ vəvəri ɐ kwa, ɐ ma sá ɐ cuna tə, ku ga pa, ɐ wàní ɐ na mu tə, ku nè ba zwèe Yɪ con. Ku mù pucɔnɪ yiri təntə ba pɪn liù swìn ɐ wú, ɐ yà

nø yèé. Yá pucvni nø yí liù, kv ga yí luv wiøn nø pín tøn, kv wá pa, kv tíu kwìn mu tøn, kv nø ba zwèe Yui con. ¹¹ Kv yí cígá, á pucvni tøn yí kv twá døn Yui fira. Á dån nønø kv tøn, pucvni tøn tøn nø tun á yira. Kv mù nø pín, á dån bĩbarĩ, søn á tun won mama, ndøn kv nø me nøv. Kv mù nø kùv pín, á dån pìà, søn á bĩrĩ døn, á ba cuna swø. Kv mù nø kùv pín, á lĩa dån zaŋa yolwan tøn yĩrĩ, kv nø tun á tètønĩ wa. Kv mù nø kùv pín, føn dån jøn aba, kv tøn yĩrĩ, á nø fwa. Kv mù nø kùv pín, á dån pìĩ á pìà, søn á na nø cígá cígá. Kv mù nø kùv pín, á dån jøn yawala, søn á tun kv tøn, Yui nø swø. Kv mù nø kùv pín, bæ tøn tøn, v nø tun cuna tøn, á dån køn wá càn wa. Yìøn tøn mama, á nø tun, á dån bĩrĩ døn, á wà yolwan tun tøn wa.

¹² Yá à dån nø dí yáá à púpúnĩ á nø, kv tà bæ tøn, v nø tun lwanĩ tøn yĩrĩ. Kv ma kùv tà liù tøn, ba nø tun lwanĩ tøn v yira yĩrĩ, à púpúnĩ á nø. Yá kv yí à púpúnĩ á nø, søn kv pa, á nø bĩbarĩ, søn á tun á pa nøba tøn, wànĩ kv nan yĩrĩ nø, á tètønĩ wa Yui yáá con. ¹³ Møn kv mù nø pín, nø bĩcanĩ zùrĩ. Yá kv ga tà nø bĩcanĩ nø zùrĩ tøn cĩcĩ. Kv tøn nø sùrĩ lá, nø pwĩ døn poli zøn zøn, á mama nø pín Titøn pubøn ya bwálĩ nøv, v pùé ga poli tøn yĩrĩ. ¹⁴ Titøn mù con, à tì á yoo à ma bu à tìøn nø. Yá à wà cavĩra dí. Nøn swìn yoo mama á con, døn cígá. Yá kv kwa nø, yìøn tøn mama, nø nø bùà á nø tøn yĩrĩ, Titøn yáá con yí cígá. ¹⁵ Yá v yáá pìĩ v líĩ nøv tøn, á nø sèe, á pa v zurĩ á yuu, døn nøv tøn, á mama nø sèe v nii, á nø zilĩ wá zøn zøn, døn á vĩvaga v yáá con. Yá v dån yáá kwèn v sònĩ aba, v sùrĩ wuu. ¹⁶ À pùé poli døn, à nø wáá á yuu

wa jələ yoo mama wa tē yiri.

8

*Səbiu tē, ba nə lá, sə ba pa Zwerizalemə
Kərisə lià tē nə yoo
(Marəkə 12.41-44)*

¹ À nubia-ba, nə pià, sə nə man nə biri aba, Yu nə fwa v pubwanv tē, Masedwanə nagwanaa *Kərisə lià púló tē wa nətv. ² Yièn wuwali ba, tē pa ba dí càn zənzən, yá ba ga tē wulə pupwən wa, ba ja le tia nə. Zuri də jə ba zənzən, ku ja le tia nə. Yá ba tē san lià tē nə də wuywan nəfarv. ³ Ba pin səbiu, ndə ba nə wàá ba pin nətv. À tətə ni ku nə yin nətv. Ba pin səbiu zənzən, ba ja le ba diàn mánjá tətə, ku ga yi ku twá də ba tətə fira. ⁴ Ba lòri nəba pwə pwə, sə nə pa ba cwəŋə, sə ba kə ba jìàn ku tutuŋi təntə wa, ba ma san lià tē nə, Kərisə nə ti. ⁵ Ku tē, ba nə tun, ku dwə ku tē nə yà nə buŋa də, ba wá tun. Ba dí yáá, ba ti ba tiàn ba pa *Yuu-Tiu nə. Ku kwa nə, ba tē pin ba tiàn nə də nə, ndə Yu nə pià nətv.

(Romə tián 15.25-27; 2 Korentø tián 9.6-15)

⁶ Titə dí yáá v lá səbiu tē á con, yá v ga tē wà zwèe. Mə ku mù yiri, nə lòri wá, sə v dàñ tun ku wuywan tutuŋi təntə, v zwèe. ⁷ Á jə wiən tē mama Yu cwəŋə tē wa. Á keni á waa Zwezi-Kərisə nə wuu. Á swìn Yu svuŋ tē zəni. Á yèó cigá tē də zəni. Á bıbari mánjá mama, sə á tun. Á swə nəba zənzən. Ku mù yiri, á dàñ tuŋa ku wuywan tutuŋi təntə, á sùrí lá wuu.

⁸ Ku tē, à nè swèn yəbə, ku tà nii à pɪn aba, sə á twá ku nə. Ku yɪ yoo, à maŋa à bɪrɪ aba, sə á lwarɪ Kərisə lià púló tē duən nə bɪbarɪ ba tɪn ku yoo tɛntə lala nətv. Á də tɪŋa ku yoo tɛntə, á ma bɪrɪ də, á swə Kərisə lià tē cígá cígá. ⁹ Á yəó, nə Yuu-Tiu Zwezi-Kərisə nə fwa v pubwanv tē á yɪra nətv. V mù yà jə wiən tē mama, v ga yá tē, v jì zɪrv á mù yɪrɪ. V jigə zɪrv, sə v pa á mù dàń jì jɪjə tián Yu yáá con, v zɪrv tē yɪrɪ.

¹⁰ Ku yɪ à də nə buŋa nətv səbiu tē yoo wa nə, à pìà, sə à bɪrɪ aba. Bɪrɪ tē, ku nə lɛ, á mù nə yɪn tɛntən lià, á nə dí yáá á lá səbiu tɛntə. Á mù ga nə yɪn tɛntən lià, də á nə sóní, sə á tɪn ku yoo tɛntə. ¹¹ Síún nə, á dàń tɪŋa ku tutɪŋɪ tē, á ja va á yí ku yígúré, ndə á nə kə sírí, sə á tɪn ku nətv. Á pɪan ku tē, á dɪàn nə yí, sə á pa, sə ku yoo tē nii sú. ¹² Á nə kən á sírí, sə á tɪn zìlò lià yɪra, ku yɪ yoo tē, ku nə zìən. Yá ku dàń nə mɛ, sə á tɪn zìlò tɛntə də won tē, á nə jə. Ku tà won tē, á nə ba jə nə, á wá ma tɪn tē. ¹³ Ku tà á mɛ, sə á dɔ càn lià tē yuu yìèn yɪrɪ, sə ba mù dàń ga ya sié wa. ɔn ɔn, ku tà nətv. Á mama mɛ, sə á mɛ duən. Síún nə, á mù jə wiən, tē búrí aba. Ku zìən, sə á lɪ tē wa, á pa lià tē nə, ba nə ba won mama jə. ¹⁴ Máná tē, á də nə twi á ba jə, də ba də nə kúv lwàn ba jə zənzən, ba də kúv wá pa á də nə. Yá ku nətv dàń wá pa, á mama mɛ duən. ¹⁵ Ku nətv dàń wá ya ndə, ku nə púpúní Yu sagɪ tē wa, ku wú: «Liù tē, v pèe wodirən, tē búrí wá, tē kúv wà ku tíu búrí. Yá liù tē də, v nə

pèe wodirən, tə mùrì wá, tə kùbè wà wá mùrì* ».

*Titə də Kərisə lià duən wá va Korēntə
(1 Korēntə tián 16.1-4; 2 Korēntə tián 9.1-5)*

¹⁶ Yı ken à yawala tətə yiri Titə bıcan wa, sə v bà v san aba. Yá nə dān kəni Yı lèèèe kú yoo təntə yırı. ¹⁷ Titə sèe kú tə, nə nə lòrì wá kú yırı. Yá kú tà kú cıı. U tətə bıri də, v ken sírí, sə v bà á con də v tətə fıra. ¹⁸ Nə dān tɔn v mù liù don, v nə yı nə nubiu *Kərisə yırı, á con. Kərisə lià púlé tə mama bıv v mù bɛɛ təntə nə, v nə swın Zwezi-Kərisə sɔywájú tə zəni zəni tə yırı. ¹⁹ Kú tə nə súrí lá, v yı Kərisə lià púlé tə nə kúrí wá, sə nə mù də wá twá lá, nə lá səbiu tə. Mə nə mù nə ba lı ba tún, sə nə tɔn tɔtɔnzəŋu təntə, sə kú pa dun *Yuu-Tiu nə, kú ga wá bıri də, nə pìà, sə nə san lià tə nə. ²⁰ Səbiu tə dáá zənzən, ba nə ken nə jìàn wa. Yá nə dān pìà nə cì nə tiàn nə, ba dān ká cəgə nəba, kú səbiu təntə yırı. ²¹ Nə pìà nə fwa kú tə nə zìən Yuu-Tiu yáá con, kú tà kú cıı, kú yı də ləzoni də yáá con. ²² Nə tɔn liù don də, v nə yı nə nubiu Kərisə yırı, nə súrí lià bələ tə nə. Nə twá yìèn zənzən nə, nə na də, v yáá bıbarı, sə v san v duən nə zənzən. Síún nə, v dān dugv v tiàn, sə v tɔn cígá cígá, v nə jələ á yuu wa tə yırı. ²³ Titə mù yı à twadon, à mù də wá nə tɔŋa duən nə, sə nə ma san aba. Yá Kərisə lià bələ tə duən tə, ba də Titə nə wá twá duən, yı Kərisə lià púlé tə nə tɔŋa ba á con. Ba yı ba tɔŋa, sə Zwezi-Kərisə na dun. ²⁴ Á pıan

* **8:15** 8.15 Máná tə, *Yızərayelə lià tə nə yın kasɔɔ lanworu tə wa, Yı pın wodiú don nan yı nə, kú tɔ. Ba bɔŋə kú wodiú təntə «manə».

Kərisə lià púlé tə lwarı də, á cígá swə lià, yá nə də ga jə cígá, sə nə ti á yoo, nə ma bwı nə tián nə ba yáá con.

9

Yı swə liù tə, v nə pın də pupwən

¹ Kú kúv ba dèń jə də, à nə púpúnı à pa aba, sanɔ tə yırı, nə nə wá tun *Zwerizalemə lià tə nə, *Kərisə nə ti. ² Kú yı cígá, à yèé də, kú yı á tətə yà nə ken kú sírí, sə á san ba fuən. Kú mù nə pın, à ti á yoo à ma bwı à tián nə Masedwanə nagwanaa Kərisə lià tə yáá con. À swın ba con də, á mù Korentə Kərisə lià tə də Kərisə lià tə duən tə, ba nə wulə Akayi nagwanaa tə wa, yı dıan mama á tanı, sə á lá səbiu tə. Yá á yawala tə yigu Masedwanə nagwanaa lià tə zını, sə ba də tun kú. ³ Kú yı nətı, yá à ga tə tunja Kərisə lià ba tə á con, sə kú pa á kwen á tanı səbiu tə, ndə à nə swın á yoo nətı. Kú nətı dən wá pa, nə nə bwı nə tián nə á yırı tə, dən ká bà kú jı tutı. ⁴ Á dənà ká pa, à mù də Masedwanə nagwanaa Kərisə lià tə bà nə yı á con, sə ba na də, á wà tanı á zwèe, sə kú pa à nii mwarı də, nətı tə, à nə bırı də, à jə á dıan kú yoo tə wa. Yá kú ga wá pa á də tətə níé mwarı. ⁵ Kú mù nə pın, à bún à na də, kú me, sə à kwè lià batwa kú tə, ba nə yı nə nubıa Kərisə yırı, sə ba dí à yáá ba bà á con. À pià, sə ba san, sə á wàní á tanı á wıywan sanɔ tə, á nə dí yáá á swın də, á wá pa tə, á kə duən nə. Kú nə tun nətı, à dən bıàn, sə à yı á con, də á ken səbiu tə me duən nə á zwèe. Kú

nøtv wá biri də, səbiu tə yi á pɪn kv də á bɪcanu mama, kv tà liù nə kálú aba.

(1 Timote 6.17-19; 1 Zwan 3.16-18)

⁶ Á yèé də, liù nə dùè mancɪn, mə kv mancɪn tə, v wá za. Yá liù nə kúè dùè won zənzən, v ja ɛ tia nə, v wá za zənzən, v ja ɛ tia nə. ⁷ Á liù mama mɛ, sə v pa səbiu tə ndə v tətə nə bún v na nøtv v waa con. Kv dàn ká ya də pucɪni, nə à yèé ndə ba kálú wá, sə v pa kv. Kv yi cígá, Yɪ swə liù tə, v nə pɪn də pupwən. ⁸ Yá Yɪ diàn yí, sə v fwa pubwanv yiri mama á yɪra, v pa á na wiən zənzən, tə nə dwə wiən tə, tə yoo yà nə jə aba. Yá tə wiən tə dàn wá yí aba zənzən, tə ga zənzən á ma tɔŋa zəni yiri mama. ⁹ Kv wá ya, ndə kv nə púpúní Yɪ sagɪ tə wa, kv wú:

«Cígá tíú yàá tàrì v jɪjə wiən, v pɪn zura nə.

Yá v cígá tə tutɔnan tə wulə wuuu, máŋá mama kv nə ba zwèe».

¹⁰ Kv yi Yɪ nə yáá pa wodwii tə là nə, sə ba dù. V mù ga nə pɪn ba nii wodi də. V wá pa wodwii tə á də nə, v ga wá pa, kv wodwii təntə pùlì zənzən, sə á wàní á tun tutɔnzəŋə zənzən, tə nə biri də, á yi cígá tián Yɪ yáá con. ¹¹ Yɪ wá pa, á na jɪjə yiri mama, sə á ma san là nə də wɔywanv. Yá là zənzən dàn wá kə Yɪ lèèè á zílé wiən tə yɪrɪ, nə nə jɔŋə nə pɪn ba. ¹² Á səbiu təntə, á nə pɪn Zwerizalemə là tə nə, Kərisə nə tɪ, kv tà kv saŋa ba cɪcɪ. Kv wá pa, là zənzən kə Yɪ lèèè ba ja ɛ. ¹³ Á saŋv təntə wá biri də, á twá Yɪ cígá cígá, kv ga wá pa Yɪ na dun zənzən, də là tə nə yèé də, á sèe Zwezi-Kərisə sɔywanjə tə zəni, ndə á nə dí yáá á swɪn kv nøtv. Ba wá

pa dun Yü nê á wiën tê dê yiri, á nê pin ba, dê tê tê yiri, á nê pin là tê mama nê. ¹⁴ Yü fwa pubwanu á yira zenzên, u ja le tia nê. Yá ku nêtu wá pa, là tê sóní aba, ba ga lòrì Yü ba pa aba. ¹⁵ Nê kèni Yü lèèèè u tarpìun tê yiri, u nê pin nêba, ku nê ba man don jê.

10

Polê caga u tutuñi tê yiri

(1 Korentø tián 2.1-5; Romø tián 15.17-19; 2 Korentø tián 6.4-7; 13.2-4, 10)

¹ À mù Polê lòrì aba dê, Zwezi-*Kërisê bɪcabwanu tê dê u wɔywanu tê, sê á cugu à nii sugu. Ba yàá swìn dê, à nê wulê dê aba, à yì bwàbwà. Yá à nê lwàn à va bwálí don, à yoo yàá dà. ² À lòrì aba, sê á dànà ká kálú nê, á pa à yoo ya diàn, máná tê wa, à nê wá bà á con. Là duên wulê, ba nê buña dê, nê tutunee tê yì ndê læzoni pubuña tutunee nê. Mê ba mù là têtê yuu wa, à wá pa à yoo ya diàn. ³ Ku yì cígá, nê yì læzoni nê wulê luv wa, yá nê jaña tê mù tà ndê là tê, luv nê tì ba, jaña nê. ⁴ Kwatarì zila tê, nê nê ma jaña ku jaña têtê, tà læzoni kwatarì zila. Tê kwatarì zila têtê yì Yü diàn tê kwatarì zila. Tê jê diàn, sê tê cùgù kunkun pubuñi tê, tê nê yì ndê duña tê dii nê, tê nê jê diàn. ⁵ Nê yàá cùgù fwìe wiën tê mama, tê nê cì là yàá nê, sê ba dàn ká lwarì Yü. Yá nê yàá swìn, nê pa là lwàn ba pubuñi, ba ga zilí Zwezi-Kërisê nii. ⁶ Nê ken nê sírí nê dànì máná tê, nê nê wá na dê, á zilí nii cígá cígá, sê nê dàn kè càn là tê nê, ba nê ba nii zilí.

7 Á με, sə á twá yìèn tə yáá wa, á ma ywàṅá tə. Də liù nə buṅa də, υ jə cígá, υ mù yí Zwezi-Kərisə nə tí, ku tíú με, sə υ lwarí də, ku tà υ cíci, nə də yí Zwezi-Kərisə nə tí nəba. 8 *Yuu-Tiu nə ken diàn nə jùn wa, sə nə ma dàn á jìàn Yü cwəṅə tə wa. Ku tà, sə à mà cùgù aba. Də à nə swə, à bu à tiàn nə zənzən tə diàn təntə yiri, ku cavıra bá jə nə. 9 Á ba pià, sə ku ya ndə à saga tə yí à púpúní, sə à ma kə fən á waa. 10 Ku yí cígá, lià duən swìn də, à nə púpúní sagı á nə, à yáá púpúní yìèn tə nə cà, tə ga jə diàn zənzən. Yá à dàn nə twi á con, à yáá bwàná, à sùràn tə də ga ba dèñ jə. 11 Ba mù lià tə, ba nə swìn sùràn təntə με, sə ba lwarı yoo ku tə: Yoo tə, nə nə púpúní saga tə wa, nə pa aba, də nə bwálí tə ḡúná, máṅá tə, nə nə wá bà á con, nə wá fwa ku yoo təntə, ndə nə nə púpúní ku nətu.

(Romə tián 15.20-21; 1 Korentø tián 15.8-10)

12 Lià duən jələ ba tiàn ba kəni ban ban. Nə mù wɔdɪv wà yí, sə nə swìn də, nə mù də ba mù nə με duən. Nə wɔdɪv də wà yí, sə nə tí nə tiàn nə ma man də ba. Ba mù tətə nə yáá maṅa duən, ba ma biri ba liù mama nə με nətu. Ku biri də, pubuṅa mùri ba. 13 Nə mù yí nə wá bu nə tiàn nə Yü tutuṅı tə cíci yiri, υ nə pın nəba. Nə bá bu nə tiàn nə yiri don, ku nə dwə jùn. Nə tutuṅı təntə, Yü nə pın nəba, ku mù nə ja nəba, ku bà ku nan á con. 14 Yá nə dàn nə twi á con də Zwezi-Kərisə sɔywáṅú tə, nə wà ku tə, Yü nə swìn nə con, tə lɛ. 15 Nə mù ba tutuṅı tə, lià duən nə tun tí, nə ma bwı nə tiàn nə, sə nə dàn ká lɛ ku tə, Yü nə swìn nə con. Yá nə dàn ja

yala də, á tə wá kwɛn á kə á waa Zwezi-Kərisə nə zənzən, sə kʊ tə, nə nə tun á con tə, wàní kʊ sʊrí, ndə Yɪ nə tərì ʋ pa nəba nətʋ. ¹⁶ Kʊ mù təntə kwa nə, nə dān wá lɛ á nagwanaa tə, nə va yɪɲɒɪ nagwanɛɛ tə wa, nə swìn Zwezi-Kərisə sʊywánú tə. Nə mù ba pià, nə va nə tun bwálí nə, lià duən nə dí yáá ba tun kʊ wa, yá nə pií nə tì ba tutɒɪ tə, nə ma bwɪ nə tìàn nə. ¹⁷ Kʊ púpúní Yɪ sagɪ tə wa, kʊ wó: «Liù nə pià, sə ʋ bʊ liù nə, sə ʋ bʊ Yuu-Tiu nə kʊ tə yɪɪ, ʋ nə fwa». ¹⁸ Kʊ tà liù tə, ʋ nə bwɪ ʋ tìàn nə, nə Yɪ yáá jələ. Kʊ yɪ liù tə, Yɪ tətə nə bwɪ ʋ nə, nə Yɪ yáá jələ.

11

Polə də kunkʊn tvntvna tə yoo

(Galasi tián 1.6-9; 2 Korentø tián 12.11-15; Matìə 7.15-20; Romə tián 16.17-18)

¹ Á jana pínú də nə. Síún nə, à dān pià, sə à swìn nyɪnyan sùràn mancɪn. ² À mù ba á yɪɪ sèe, ndə Yɪ nə ba á yɪɪ sèe nətʋ. À yɪ à tanɪ aba à tún, ndə ba nə tanɪ kan nətʋ, sə á swe bɛɛ nədʋ cɪcɪ nə. Kʊ bɛɛ təntə nə yɪ Zwezi-*Kərisə. Yá à dān pià, sə á dān ya lià tə, á bɪcanɪ nə yɪ nəpon máná tə, à nə wá pa aba Zwezi-Kərisə nə. ³ Yá fən dān jə nə də, liù nə wá gɪgarɪ aba də kunkʊn sùràn, ʋ pa á kùb ba á tìàn lɪ durən wa, sə á twá Zwezi-Kərisə nə də cígá cígá. Mə nətʋ *Sɪtana jigə dən, máná don wa, ʋ gɪgarɪ ɛvə də kunkʊn sùràn. ⁴ Fən jə nə, à nə yèé də, liù nə twi á con də kunkʊn sùràn, á wá kə á nii ba kwa á pa ʋ

kàrì aba tē yiri. Yá nētū tē, v nē wá swìn Zwezi-Kērisē yoo v biri aba, dē nētū, nē nē swìn v yoo nē biri aba, kv tà nēdv. Siñu tē dē, v nē pià v pa aba, kv tà siñu tē, á nē dí yáá á na. Zwezi-Kērisē suywánú tē, v nē wá swìn v biri aba, kv tà suywánú tē, nē nē swìn nē biri aba.

⁵ Á mù buña dē, ba mù lià tēntē yi *tuntuna yáá tián. Yá à dē con, à dē na dē, ba ba nē dwē won mama wa. ⁶ À mù sēe, à yèrì sùràn à swìn ndē ba nē. Yá kv dàñ nē yi yēnu mù, à dē jē yēnu. Nē biri aba kv yēnu tēntē nēpon nēpon nē kapupu.

⁷ Máná tē, à nē swìn Yū suywánú tē à biri aba, à ken à tián tia, à ga wà pa á ñwín kv, sē à ma zìn á mù yi nē. Kv nētū tē yi yolwan, à fwa naaa? ⁸ Máná tē, à nē yin á con, kv yà yi Kērisē lià púlé duēn nē ñwín nē, kv tà á mù. Á jon ba sēbiu tē, sē à ma wàní à san aba. ⁹ À nē yin á con, sēbiu yoo jin nē, yá à wà pa à ya á liù nēdv tētē yuu zili. Kv yin Kērisē lià tē, ba nē wulē Masedwanē nagwanaa tē wa, nē twi, ba pa nē kv tē, kv yà nē mùrì nē. Yoo mama wa, à wà sēe à jì á yuu zili, à ga bá sēe à jì á yuu zili míámíán. ¹⁰ À wàá à tián nē à bwì dē kv yoo tēntē, liù mama ga wàrì kv yáá nē v cì Akayi nagwanaa tē mama wa, Zwezi-Kērisē cígá tē yiri, ka nē wulē dē nē. ¹¹ À dàñ bwe aba, sē à jén, kv yoo tēntē yi à fwa kv, à nē ba aba swē yiri naaa? Òn òn, Yū yèé dē, à swē aba. ¹² À tē wá tun tūtū, ndē à nē dí yáá à tun nētū, sē kv pa lià tē, ba nē pià ba bu ba tián nē dē, ba dē tuña, ndē nē dē nē tuña nētū,

dàn ká wàní ba bu ba tián nø. ¹³ Bara tontø yí kunkun tontuna. Ba yàá fwa, ndø ba yí Zwezi-Kørisø tontuna, yá ku ga tà cígá. Ba yí tütònà tø, ba nø gígarí là. ¹⁴ Á dànà ká pa ku yoo tontø gwárí aba. Sítana tøtø yàá lwán v tián v jø ndø v yí Yü *malíka, v nø wulø poni wa. ¹⁵ Dø Sítana nø tønə nøv, á dànà ká pa ku gwárí aba dø, v tütònà tø nø yàá fwa ndø v nø. Ba tønə ku tø nø tà cígá. Ba yígúré wa, càn nø wá ya ku tø, ba nø tun ŋwírán.

Càn tø Polø nø dí yoo

(2 Korentø tián 15.10, 30-32; 4.9-13; 6.3-10; Tvtvnan 20.18-27)

¹⁶ À tø píí à bwé à swìn á con, á liù mama dàn ká bún dø, à yuu tèlé. Yá á dán nø buŋə dø, à yuu tèlé, á pian nø cwəŋə, sə à dø bu à tián nø mancín. ¹⁷ Ku tø, à nø swìn yəbə, à wə cwəŋə lòri *Yuu-Tiu con, sə à swìn ku. Yá ku dán yí à swìn ku, ndø à yuu tèlé, à nø yèð dø, yìèn wulø, à nø wáá à ma bwí à tián nø yíri. ¹⁸ Là zənzən twá læzoni pubuŋə nø, ba ma bwí ba tián nø. À dø dán wá bu à tián nø, ndø ba nø. ¹⁹ Á buŋə dø, á yí yənu tián, á ga nø ní là tø, ba yun tèlé, á yàá swə, sə á ja á kə ba nø mwálí mwálí dø pupwən. ²⁰ Ba yàá ja aba, ba ma jì, ndø ba ywəŋə nø, dø ba fwa swian, ba ma jonə á wiən. Ba yàá gígíri aba, dø ba goni aba, dø ba mà á yáá wa. Yá á mù tø janí á kəni ba nø. ²¹ Nø mù yun fənyina zənzən, sə nø tun tø yìèn tontø á yira. Ku mù nø pín, cavira jø nø, sə à swìn nø yoo.

Síun nɔ, à dàń wá swìn, ndə à yuu tɛ̀lɛ́. Won tɛ̀ mama liù nɔ ba fɛ̀n dɛ̀ri, sɛ̀ ɔ bu ɔ tián nɔ ku yiri, à dɛ̀ ba fɛ̀n dɛ̀ri, sɛ̀ à bu à tián nɔ ku won tɛ̀ntɛ̀ yiri. ²² Ba yàá swìn dɛ̀, ba yi *Ebərə-ba cígá cígá. À dɛ̀ yi Ebərə cígá cígá. Ba yàá swìn dɛ̀, ba yi *Yızərayelə lià cígá cígá. À dɛ̀ yi Yızərayelə liù cígá cígá. Ba yi *Abərahame dwíí tɛ̀ wa lià. À dɛ̀ yi Abərahame dwíí tɛ̀ wa liù. ²³ Ba yàá swìn dɛ̀, ba yi Zwezi-Kərisə tɛ̀tɔ̀nà cígá cígá. À dɛ̀ kúù dwə ba, Zwezi-Kərisə tutuŋi tɛ̀ wa. Sɔgɔ ku tɛ̀, à nɔ swìn, ku yi ndə à yuu tɛ̀lɛ́. À tun à doni ba. Ba ken nɔ bǎn diè nɛɛ kapɔɔɔ, ba doni ba. Ba mà nɔ zɛ̀nzɛ̀n, ba doni ba. Nɛɛ kapɔɔɔ à mu wá zwèe ku doni ba. ²⁴ *Zwifə-ba yun tián tɛ̀ mà nɔ tanpɔɔ yíá fitwa dɛ̀ nɔgɔ nɛɛ bonu. ²⁵ *Romə yun tián mà nɔ dɛ̀ kafɔran nɛɛ batwa. Lià dɔli nɔ dɛ̀ kapana máŋá don wa, sɛ̀ ba gɔ. Nɛɛ batwa, à nɔ ti níá yuu bori, ku lwə, à nan à tɔ níá tɛ̀ wa. Naa nɛ̀dɔ à yin níá yuu wa, dɔn nɛ̀dɔ dɛ̀ titin nɛ̀dɔ. ²⁶ Nɛɛ kapɔɔɔ à vɛ̀li bwálá, à dé càn, mɔnɛɛ nɔ súé tɛ̀ pàlí yiri, dɛ̀ ŋwina yiri, dɛ̀ à tɛ̀tɛ̀ dwíí tián Zwifə-ba yiri, dɛ̀ lià tɛ̀, ba nɔ tà Zwifə-ba yiri. À dí càn tɔfaran wa dɛ̀ kasɔ lanworu wa, dɛ̀ muɔ tɛ̀ yuu. Kunkun lià, ba nɔ yi nɔ nubɔ Kərisə yiri, tɛ̀ dɛ̀ ken càn à nɔ. ²⁷ À tun tutɔncaran à yira cɛ̀. Dɔn don nɔ, à yàá wà̀rì à dwèe. Dɔn don nɔ, niɛn yàá ja nɔ, nanyɔni dɛ̀ jɔn nɔ, à ga píní à tián. Dɔn don nɔ, à wà̀rì wodiu à ni à dé. Dɔn don nɔ, waran yàá ja nɔ, à ga ba gànù jɛ̀. ²⁸ Yoo tɛ̀, ku nɔ súrí tɛ̀ntɛ̀ mama nɔ, ku yi Kərisə lià púlɛ́ tɛ̀ mama yoo jɛ̀

nə à bɪcan wa. Mánǵá mama, à bɪŋa ba yoo, à ba zwèe. ²⁹ Liù nə ba diàn jə Yu cwəŋə tə wa, ku yáá yɪ ndə ku yɪ à mù. Liù nə pɪn, liù dugv Yu cwəŋə tə, ku yoo tə yáá yì à də zənzən.

³⁰ Də à dǎn nə mɛ, sə à bu à tiàn nə, ku yɪ wiən tə, tə nə bɪrɪ də, à ba diàn jə, à wá ma bu à tiàn nə. ³¹ Nə Yuu-Tiu Zwezi-Kərisə nyɪna Yu yèé də, ku tà kɪnkɪn à kɪnɪ. U mɛ, sə ba bu v nə mánǵá mama wuuu, ku nə ba zwèe. ³² Mánǵá don wa, à vɛli Damasə, də pìú Aretasə lɪ yáá tíú v tún, sə v ywǎn ku yuu v pa wá. U mù liù tɛntə lɪ lià, sə ba cì tiv tə nii nə, ba ma ja nə. ³³ Yá Kərisə lià tə dǎn ken nə fɪyafarv wa, ba vwə ŋwənə ku nə, ba twá cəliri ba lɪ nə, ba cwi tia béré tànǵá nə. Yá ku dǎn pɪn à jén v jìàn wa.

12

Wiən tə, Yu nə bɪrɪ Polə nə yoo

(1 Korentø tián 2.3-5; 2 Korentø tián 4.7-10)

¹ À tə mɛ, sə à kwen à bu à tiàn nə, naaa? À yèé də, ku nətv ba nywarɪ jə. Yá à dǎn tə wá swìn won tə nə, ku nə nan *Yuu-Tiu con, də ku tə, v nə bɪrɪ nə. ² À yèé *Kərisə liù* don, ku ja bɪna fugə banɪa, Yu ti wá, v ja di ban ban v mù Yu *sǎn nə. À mù dǎn nə yèrɪ, də ku nə yɪ v tətə, nə à yèé ku nə yɪ v jèré. Yu nə yèé, ku nə yɪ nətv. ³⁻⁴ Yá à dǎn nə yèé də, Yu ti bæ tɛntə, v ja di v mù Yu sǎn nə. À dǎn nə yèrɪ, də ku nə yɪ v tətə, nə à yèé ku nə yɪ v jèré. Yu tətə nə yèé ku, à mù yèrɪ ku. U dǎn nə diǵà v yí Yu yáá con,

* **12:2** 12.2 Ku bæ tɛntə yɪ Polə tətə.

v ni sùràn lá nø, tø nø wàrì tø swìn nii wa. Liù
 mama wà me, sø v twá v swìn tø sùràn tørtø v
 nii wa. ⁵ À bwì à tiàn nø kv mù bæe tørtø yiri.
 Yá à dàñ nø bá bv à tiàn nø won mama yiri, dø
 kv nø tà wiøn tø yiri, tø nø biri, dø à ba diàn jø.
⁶ Dø à yà nø pià, sø à bv à tiàn nø, à yà wá swìn
 cígá tø, à sùràn tø yà bá ya ndø nyinyansöran
 nø. Yá à dàñ nø ba pià, sø à bv à tiàn nø nøtv. À
 ba pià, sø lià bún yoo, kv nø dwø nø, ba pa nø. À
 pià, sø lià zilí nø, kv tø yiri, ba nø ni à nii nø, dø
 kv tø yiri, ba nø ni dø, à fwa. ⁷ Yü ba pià, sø à
 fwa fwìø, yìèn tørtø mama yiri, tø nø dwø won
 mama, v nø biri nø. Kv mù nø pün, Yü dàñ ma
 fwa yoo don à yira tø wa, kv nø yì nø zenzøn.
 Kv yì ndø Yü pün cwøñø *Sütana tütònø nø, sø
 v mà nø. ⁸ Kv yoo tørtø yiri, à lòrì Yüu-Tiu næe
 batwa, sø v li kv à yira. ⁹ Yá v dàñ le nø, v wó:
 «À pubwanv tø, à nø fwa n yira, kv me mú. À
 wáá n nø ba diàn jø tø nø à twá, à ma kwen à
 tønja diàn zenzøn». Kv dàñ nø yì nøtv, à mù wá
 bv à tiàn nø, à nø ba diàn jø tø yiri, sø kv pa
 Zwezi-Kørisø diàn tø ya dø nø wuu. ¹⁰ Kv mù
 nø pün, máñá tø, à nø ba diàn jø, nø à yèé lià
 nø twìn nø, nø à yèé ba nø fifin nø, nø à yèé ba
 nø keni nø càn wa, nø à yèé pucvni nø zva nø
 Zwezi-Kørisø yiri, à tø wulø pupwøn wa, dø kv
 nøtv mama Zwezi-Kørisø yiri. Kv yì cígá, máñá
 tø wa, à nø ba diàn jø, mø kv máñá tørtø wa, Yü
 yáá pa nø v diàn tø cígá cígá.

Korentø Kørisø lià tø yoo yì Polø

11 Nətv tə, à nə bùà à tián nə, ku yí ndə à yuu təlél, ku ga yí á mù nə kálú nə, á pa à tun ku. Yá á mù yà nə mɛ, sə á bírɪ nətv tə à nə yí, sə lià yəni nə. À mù nə swə à tà won, *tuntuna tə, á ma bonɔ yáá tián tə də, ba nə dwə won mama wa. 12 Á tətə yəé də, à nə twi á con, à tun á tətəŋi wa də pínú, Yí də ga twá də nə, ɔ tun yìèn tə nə yí ɔ diàn tə mɪmɪnan, də tutunan tə nə bírɪ ɔ diàn tə, də yomɪlan. Tə yìèn təntə mama bírɪ də, à cígá yí Zwezi-*Kərisə tuntunu. 13 Yìèn tə, à nə fwa Kərisə lià púlél tə duən wa, mə tə mù nə à fwa á də con. Yoo nədu cɪcɪ nə, à wà fwa á con. Ku mù nə yí, à nə wà pa à ya á yuu zɪlɪ tə. À dān lwèè á nə, ku yírɪ.

14 Síún nə, à kùv ken sírí, sə à bà á con, sə ku dān ya à nɛɛ batwa nə. À nə twi, à bá sèe, à pa à jì á yuu zɪlɪ. À mù yí á tətə nə à pìà, ku tà wiən tə, á nə jə nə à pìà. Á yəé də, ku tà bìsíná nə mɛ, sə ba pìà wiən ba tún ba nyɪna nə, ku yí nyɪna, ba nə mɛ, sə ba pìà wiən, ba tún ba pa ba bɪa nə. 15 À mù sèe, sə à cùgù wiən tə, à nə jə, sə à ma san aba. À ga sèe, sə à kwìn à mɪ tə tətə nə á yírɪ. À nə swə aba zənzən nətv tə yírɪ, ku mɛ, sə á mù sóní nə mancɪn cɪcɪ, naaa?

16 Á yəé zəni də, à wà pa à jì á yuu zɪlɪ. Yá á wa lià duən dān swìn də, à tun yíá swɪan, à ma jon á wiən. 17 Lià tə mama, à nə tun á con, ba wà tətə nə à twá, à ma gɪgɪrɪ aba? 18 À mù nə kwè Titə, sə ɔ bà ɔ na aba, à ga swìn nə liù tə don con, ɔ nə yí nə nubiu Kərisə yírɪ, sə ɔ kwé

wá. Titø gıgıri aba, υ jon wiøn á con, naaa? Á yèé dø, à mù dø Titø pubuŋa yi nødu. Ku tø υ nø fwa, dø ku tø, à nø fwa yi won nødu.

¹⁹ Ku wàá ku pın, á buŋa dø, nø sùràn tø tø mama yi nø pià nø ma caga nø tiàn yiri, á yáá con. Ku tà nøtu, ku yi Yu yáá con sugu, nø swın, nø mù dø Zwezi-Kørisø nø vwø duøn nø tø yiri. Nø nubisoni-ba, sùràn tøntø mama yi nø swın á con, sø tø wànı tø dån á jìàn Yu cwøŋø tø wa.

²⁰ Føn jø nø dø, dıın don, à nø wá bà á con, dø á jigø yiri don, à nø ba swø. À nø twi, dø ku yi nøtu, à dø wá ya yiri don, á dø nø bá sónı. Føn jø nø, à ba swø, sø à bà á con, dø á dı jara dø duøn, nø à yèé á ja wøgwıı dø duøn, nø à yèé dııı wulø á tətøŋı wa, nø à yèé á jıga duøn nø, sø á donı duøn, nø à yèé á swın yolwana á pın duøn nø, nø à yèé á maŋa yìøn á pın duøn nø, nø à yèé á fwa fwıø, nø à yèé á tuŋa yìøn gure gure. ²¹ Føn tø ma jø nø dø, à nø wá bà á con, naa ku tø nø, à nyına Yu nø kúú wá pa, cavıra ja nø á yáá con. Føn tø ma jø nø dø, à nø wá bà á con, dø lià dáá á wa zønzøn, ba nø tun cına tø ı, yá ba wà ba kwa vøvøri, ba ma sá ba cına tø. Ba bıcanı dån tø yi nøzwønøn Yu yáá con, dø ba pøni duøn vøe vøe, dø ba ga tuŋa yìøn, ba ba ba tiàn janı. Dø ku nø yın nøtu, à püø wá cüğü, ba mù lià tøntø yiri.

13

*Sagı tø yıgúré sùràn
(2 Korentø tián 12.19-21; 10.1-11)*

¹ À wá bà á con, naa ku tē nē, dē à nē batwa nē. À nē yí á con, nē wá b̀̀r̀̀r̀̀ l̀̀à tē mama, ba nē fwa cuna, tē b̀̀r̀̀r̀̀. Nē wá fwa, ndē Ỳ̀i sagi tē nē sẁ̀n, ku ẁ̀: «Á mē, sē á dí yáá á nì l̀̀à b̀̀l̀̀, nē à ỳ̀è l̀̀à batwa nii s̀̀r̀̀n liù yuu wa, á d̀̀n ga zigi lá á b̀̀r̀̀r̀̀ v̀̀ b̀̀r̀̀r̀̀». ² À nē b̀̀l̀̀ nii túr̀̀ tē, à nē twi á con, à dí yáá, à dù s̀̀ú l̀̀à tē, ba nē fwa cuna tē nii nē, dē ba duēn tē dē mama nii nē. S̀̀ún nē, à ñóná dē aba, à ga tē bwé à dwi s̀̀ú ba nii nē, sē ba lwar̀̀ dē, à nē p̀̀i à bà, à bá l̀̀ ba liù mama, à dugv̀̀ v̀̀n nē. ³ À ỳ̀è dē, á p̀̀à, sē á na ku tē nē biri dē, Zwezi-*Kerisē nē twá dē nē v̀̀ sẁ̀n. Á ỳ̀è dē, v̀̀ mù tà liù tē, v̀̀ nē ba diàn j̀̀ á yáá con. V̀̀ ỳ̀ liù tē, v̀̀ nē t̀̀n dē diàn á t̀̀t̀̀n wa. ⁴ Ku ỳ̀ cígá, ba paa Zwezi-Kerisē dagarv̀̀ tē yuu wa, v̀̀ ga wà diàn j̀̀n. Yá s̀̀ún nē, v̀̀ d̀̀n wul̀̀ mu wa, Ỳ̀ diàn tē ỳ̀r̀̀. Nē dē ba diàn j̀̀, nē mù dē v̀̀ mù nē vẁ̀ duēn nē ỳ̀r̀̀. Yá nē d̀̀n wá twá dē wá, nē ya mu wa Ỳ̀ diàn tē ỳ̀r̀̀. M̀̀ná tē, nē nē twi á con, nē wá biri aba diàn t̀̀t̀̀.

⁵ Á d̀̀n bù̀n á t̀̀t̀̀ yuu wa z̀̀ni, á j̀̀n á cígá nē keni á waa Zwezi-Kerisē nē wuu. Á nē b̀̀n á t̀̀t̀̀ yuu wa ǹ̀v̀̀, á ba lwar̀̀ dē Zwezi-Kerisē nē wul̀̀ dē aba naaa? Dē ku nē tà ǹ̀v̀̀, ku wá ya á k̀̀r̀̀ á tiàn á ga. ⁶ À bù̀n dē, á wá lwar̀̀ dē, nē mù wà nē tiàn k̀̀r̀̀ nē ga. ⁷ Ku tē nē d̀̀n l̀̀r̀̀ Ỳ̀ con, ku ỳ̀, sē v̀̀ san aba, á d̀̀nà ká t̀̀n yolwan mama. Ku tà nē p̀̀à, sē nē ma biri aba dē, nē mù k̀̀r̀̀ nē tiàn nē na dē, nē dí diàn. Ku ỳ̀ nē p̀̀à, sē á t̀̀n z̀̀ni c̀̀c̀̀. Yá nē mù con, ku ǹ̀v̀̀ d̀̀n nē sẁ̀, ku ỳ̀ ndē nē k̀̀r̀̀ nē tiàn nē

ga, ku tà nè yáá. ⁸ Nə wàrì cígá tə nè nè ziga. Nə pià nè fwa cígá yìèn cici. ⁹ Ku yi cígá, də á mù nè jə Yu diàn tə, yá nè mù ba diàn jə, nè yáá wulə pupwən wa. Ku tə nè dàń lòri Yu con, ku yi, sə v san aba, sə á va yáá wuuu. ¹⁰ Mə ku mù nè pɪn, à púpúní sagɪ ku tə, à pɪn aba, də à bwálí tə ɲúná də aba. Á ba pià, sə à bà à yí á con, də yìèn wulə, tə nè wá pa, à caga á nii nè. *Yuu-Tiu yi v ken v diàn tə à jɪn wa, sə à ma dàn á jìàn Yu cwəŋə tə wa. Ku tà v pɪn tə nè, sə à ma cùgò aba.

(Filipə tián 4.4-9)

¹¹ À nubia-ba, ku tə nè sùrí lá, á yana pupwən wa. Á siá, sə Yu san aba, sə á va yáá wuuu. Á siá, sə ba kwè aba, sə á ja pubuŋa nədu. Á yana duən nè də bɪcan sié, Yá sonu də bɪcan sié Yu dàń wá ya də aba. ¹² Á jòná duən də zilé zənzən də sonu, ndə Kərisə là nè mɛ, sə ba fwa nətu. Kərisə là tə mama, ba nè wulə yəbə, jònì aba.

¹³ Yuu-Tiu Zwezi-Kərisə nè wá fwa v pubwanu tə á yira. Yu wá fwa v sonu tə á yira. Yá Yu-
*Siŋu tə, ku nè pɪn, nè vwə duən nè, wá ya də á mama.

Yu soywánó sagı
Nuni, Southern: Yu soywánó sagı New Testament
Le Nouveau Testament en Nun

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 30 Sep 2022 from source
files dated 8 Feb 2022

d18530a7-7259-5f23-92b6-70e3abe5f3fa